

國朝典故卷之三十九

否泰錄

昔我

太祖高皇帝膺受

天命驅逐胡元遯歸沙漠其末帝受權帖木兒旣殂
太祖以其君臨華夏特謚爲順帝可謂盛德至仁矣
順之遺胤據其故穴仍君長其醜類世數莫考惟
知其地名瓦剌其君立於

宣宗皇帝時者名普花此稱爲可汗而彼自稱不可
知計必仍僭其先世大號也故其臣亦悉用故時

國立中央圖書館藏



國朝典故 卷三十一
將相稱號豈非羊質虎皮鷲翰鳳音者哉稱丞相者二人一曰和寧王阿魯台一曰順寧王脫懽常遣使朝貢朝廷賜以詔書亦稱之曰王其後二人相繼死而脫懽之子曰野仙悉有二人部屬自號爲太師君臣異處常不相見普花娶野仙妹以相團結今

皇帝卽位以來野仙每年冬遣人貢馬朝廷厚荅金帛過元旦郊祀始去然久之漸桀驁不恭往來通使等變詐反覆告中國以虛實野仙求婚于

帝室通使皆私許也先進馬爲聘俄朝廷不知也荅

詔無許姻意野仙愧怒以正統十四年七月初入寇塞外城堡多陷沒邊報日至遣駙馬都尉井源等四將各率兵萬人出禦之源等旣行司禮監王振復勸

上親征命太師英國公張輔太保成國公朱勇等治兵朝臣奏疏請留不允十七日駕行

命郟王居守每旦於闕左門西南坐羣臣謁見朝政皆太監金英吏部尚書王直學士曹鼐等官軍私屬共五十餘萬人出居庸關抵宣府井源敗報踵至



上至大同驀有黑雲如傘罩營雷電而雨王振患之
乃以駕還八月十三日至狼山虜追及遣朱勇等
三萬騎還戰皆敗死無隻騎回是日駕至土木日
尚未晡去懷來城僅二十里欲入之保懷來城振
輜重千餘兩在後未至留待之遂駐土木旁無水
泉又當虜衝十四日欲行虜已逼不敢動兵士東
手饑渴虜使持書以求和爲言召曹鼐草詔與和
遣二通使與虜使偕去遂移營踰塹以行迴旋之
間行列已亂爭先奔迸勢莫能止虜騎蹂陣而入
奮長矛以擊我軍大呼解甲投刃者不殺衆裸袒

相蹈藉死蔽野塞川虜叢入中軍宦使虎賁矢被
體如蝟

上與親兵乘馬突圍不得出虜擁以去文武軍吏免
者蓬首赤身踰山谷連日饑餓得達關虜舉我輜
重惟取金銀珠寶貴細者其實虜衆僅二萬我死
傷者過半矣十六日

上在虜營手書遣使與懷來守將言被留且索金帛
懷來城閉不可入縋而登復遣人送至京師其夜
三鼓從西長安入報十七日百官集闕下頗聞敗
報私相告語愁怨驚懼出至紫陌見軍士奔歸瘡



殘被體血汚狼籍然尚未知

上所在也是日午遣使賫黃金珠玉袞龍段疋等物
馱以八馬詣野仙營請還車駕十八日

皇太后召百官入集闕下命郕王權總萬幾於午門
南面見百官始啓事奉令施行皆謂行且卽真矣
數日內外洶洶不自保已而

皇太后詔天下立皇子見深爲皇太子又數日尚書
于謙等彈奏奸臣王振傾危

宗社歷數其罪于言讀既畢王諭以自有處置謙等
言振罪惡滔天今日不正典刑滅其族臣等皆死

於此不但已也因痛哭聲徹中外王起入內中使
將闔門衆擁謙等隨入太監金英傳令旨且退衆
奮欲粹金英英懼言令藉沒振遣指揮馬順往衆
曰順奸臣黨也宜遣都御史陳鑑金英脫身入順
前勸解稍遽給事中王竑粹順首衆爭毆之蹴踏
擗裂頃刻而斃或就脫順靴擊出其眼血流門闕
前衆愈怒求內使王毛等二人英使人粹出亦擊
殺之曳三屍陳於東長安門軍士猶爭擊不已陳
鑑奉令旨率軍籍振宅并其黨彭得清內使陳管
家等項之執振姪錦衣衛指揮王山至反接跪于



庭共唾罵之乃宣令旨獎諭百官各歸蒞事拜謝
而出明旦移邸王坐入奉天門左受朝由此卽真
之議益急振宅在宮城內外凡數處皆重簷邃閣
僭擬宸居器服綺麗尚方不逮玉盤徑尺者十面
珊瑚樹高六七尺金銀十餘庫馬數萬疋鬻王山
于市其族無少長皆斬山弟林亦爲錦衣衛指揮
從振死于虜林兇悍尤甚姬妾百數二十二日虜
權

上至大同城閉校尉袁彬隨侍以頭觸門大叫於是
廣寧伯劉安給事中孫祥知府霍瑄出見獻蟒龍袍

上以賜知院伯顏帖木兒及野仙弟大同王賽刊王
上曰秋稼未收軍士久饑可全刈以入城又曰虜欲
歸我情僞難測宜嚴爲備安等獻酒

上索西瓜雪梨割與虜食訖遂去過猫兒莊九十九
海子又行見蘇武廟李陵碑二十八日至黑松林
野仙營在焉

上入營坐野仙拜稽首入侍坐宰馬設宴出其妻四
人以次奉

上酒歌舞以爲娛其後遂奉

上居於伯顏帖木兒營去野仙營十餘里伯顏帖木



見與妻共見

上拜稽首亦如野仙禮伯顏帖木兒每日獻羊七日獻牛野仙每七日獻馬二人者每出獵則又以其所獲野馬黃牛之類來獻二十九日

皇太后命王早正大位以安天下有司擇日行禮衆遂相率詣文華殿門請王出辭讓不允衆共言祖宗神器不可虛

聖母有命不可違有旨從請乃再拜山呼而出九月初野仙遣其酋長尚書來言欲送


上還京入見賜以冠帶綵段臨行以金百兩銀三百

兩綵段若干賜野仙初七日王卽

皇帝位遙尊

上爲太上皇大赦天下百官六軍賞賜有差十數日野仙復遣使至書詞悻慢朝廷復書大畧言中國已立


皇帝天下兵甲衆盛可相抗禦之意已而命羅通孫祥爲副都御史守居庸紫荆關石亨爲武清伯摠京師軍馬十日野仙入寇自紫荆關入殺指揮韓清等孫祥走死初九日虜至京師城西北關外石亨營於城北兵部尚書于謙督其軍都督孫堂營



于城西刑部侍郎江淵參其軍交趾舊將王通爲
都督鴻臚寺卿楊善爲副都御史守城虜連日抄
掠亨等與之殺傷相當其酋長鐵元帥死焉時畿
內降附胡人留居者多乘時爲寇朝廷重賞購捕
被獲者累日不絕虜稍沮復遣使言欲和十七日
以通政叅議王復爲禮部侍郎中書舍人趙榮爲
鴻臚卿持羊酒往野仙營野仙與其弟及伯顏帖
木兒掇甲冑屬弓矢

太上帶刀引復等前露刃俱之復等拜訖野仙揮却
羊酒取勅書視番字

太上取勅視漢字野仙謂復等你小官可令胡濙于
謙王直石亨等來復辭歸時四方兵漸集虜夜適
從居庸關出去遺所掠牛羊人口于路以緩追兵
太上自紫荆關出乘馬踏雪而行遇險則袁彬執鞭
旣入虜境野仙來見宰馬拔乃割肉燎以進云勿
憂終當送還食訖辭去十九日瓦剌普花可汗遣
使獻馬先此普花駐兵關外未入至是以尋舊約
通和爲言朝廷以其來緩師却之胡濙王直言普
花野仙君臣素不睦宜受其獻以間之從濙等言
亦使人入見獻馬入足賜衣冠帶酒饌金帛視常



年有加二十二日遣楊洪孫堂范廣率兵二萬擊虜之未去者二十五日破虜於固安得牛馬驢數百疋奪還人口萬餘十一月初八日以虜旣退京師解嚴降詔撫安天下十一月免朝百官望拜

太上聖節于朝天宮十三日楊洪旋師入見言虜衆已盡絕其實不過百餘散掠各羣驅人畜以自擁衛望之若數萬衆官軍不敢逼其南面去者洪等逐至關殲焉猶殺官軍數百人洪子優幾爲其殺旣奏捷以洪爲昌平侯與副都御史羅通練兵于東教場二十三日石亨練兵于西教場二十五日

野仙遣使來索大臣迎駕約以後月初三日至其營否且又入寇書詞甚慢不荅二十九日冬至免朝每年是日遣官祭長陵獻陵至是以胡寇近至山外陵旁宮宇祭器皆被焚掠守陵官軍死亡逃竄暫輟祭祀十二月初二日贈太師英國公張輔爲定興王學士曹鼐爲少傅吏部尚書文淵閣大學士皆死於土木者也初四日尊皇太后爲上聖皇太后初七日尊母吳氏爲皇太后初八日立妃汪氏爲皇后冊太上官嬪周氏爲貴妃卽皇子所生之母也初十日詔告天下赦在絞流以下重囚



景泰元年庚午正月初一日受朝免賀初七日

太上書至索大臣來迎公卿推舉舊任老成當行者
初十日大祀天地于南郊慶成賀宴如常年十八
日遣都督范廣等率兵巡居庸等關以虜入遼東
寧夏皆有報至也二十九日遣都督等官石彪等
率兵巡懷來宣府等城閏正月初十日諜報虜掠
西郵取慶陽府所牧駝馬牛羊以去二十六日大
同奏虜至城下摠兵官郭登敗之陞定襄伯二十
八日大同奏虜戰於黃土嶺獲首級十三顆馬驢
一百三十三匹頭奪還男婦三百二十五名口噐

械衣服稱是指揮使許貴之功也十四日宣府叅
將洪瑒以執喜寧內侍從

太上于虜中者數導虜入寇

上患之

太上亦以虜入寇不已和則不可必不和則還京未
有期也惡寧寧又忌袁彬嘗誘彬入營將殺之

太上覺其詐急召彬回乃得免及是彬言于

太上遣寧將命於洪索春衣因遣軍士高磐與俱彬
刻木藏書繫磐髀間以示洪俾因其來執之洪既
得書與寧飲城下磐抱寧大呼洪從兵部侍郎至



京師處以極刑於是虜失其向導亦厭兵矣十六日
以石亨爲征西大將軍率步騎三萬五千人出
紫荆關以迤北邊其後虜涉春及夏復大入六月
二十六日野仙以屢遣使議和不成俾其知樞密
院阿剌爲書遣其參政完者脫懽等來

上疑其詐召文武百官議以爲虜交兵既久士馬疲
怨又失常年和好之利度其情出于誠且

太上在虜理宜迎復虜總以詐我當推誠

上聞允遣禮部侍郎李實大理寺少卿羅綺指揮馬
顯與脫懽等以七月初一日至野仙營所失八兒

禿之地野仙曰兵端皆因通使陳友等小人締構
以致小事成大及我送

太上還京不遣大臣來議又殺使臣張關保等我向
後遣者盈不花等亦不生還其故何也實等荅曰
太師雖名送駕兵行不戢攻闕掠野朝廷豈信張
關保等死於陣者盈不花等未至京皆因將士不
以爲來和而以爲來戰故也野仙曰喜寧是朝廷
內臣我所遣來何爲亦見殺實等荅曰喜寧蒙

太上厚恩乃導引太師兵馬殺之宜矣野仙曰

太上在此我令伯顏帖木兒蚤晚恭敬未嘗失禮因



以酒酪飲實等十三日遣人引實至伯顏帖木兒營見

太上實等拜泣問起居

太上曰朕非以畋遊而出實爲生靈除害然陷於此者王振所爲也及野仙實意送朕回又被喜寧屢次阻住但唆令進兵王振喜寧皆死矣因問

上聖太后與

上安好又問舊臣數人又曰在此踰年始見卿等曾將衣服靴帽等來乎實等曰虜中屢有人走回皆不知車駕所在朝廷遣使亦無回報以此臣等行

時諸物未帶時御用物惟無龍綉枕在實等因自出所有食器燒酒煨肉爲獻復欲盡取所賚來獻太上曰小事勿勞卿等爲朕通和乃大事爾實等因極言王振曩昔擅國致寇之罪

太上曰振未敗時無人肯言然朕亦不能燭奸悔恨何及語將畢伯顏帖木兒至

太上賜酒共飲伯顏帖木兒復邀實等至其帳相與飲實等回至

太上帳求留宿館伴者不肯實等乃至野仙營宿十三日野仙置酒以飲實等野仙曰爾等念



國朝典古 卷三十一
太上否實等曰君父蒙塵臣子豈不念乎野仙曰爾等既念何不迎回實等言來迎之意野仙將從之伯顏帖木兒言禮物未備不可容易野仙乃止凡實等所與野先及伯顏帖木兒語者其妻皆並坐共議傳酒相待野先伯顏帖木兒貂裘帽其妻珠琲覆面垂肩碗酪盃肉長啜亦更互吟談歌舞以爲歡十四日野仙遣其右丞把禿同實還貢貂皮馬匹遣其尚書土木罕羅綺往大同調回虜兵不復擾邊實辭

太上袖書三通以授實其一奉

上聖皇太后其一達于

上其一諭群臣伯顏帖木兒約實速來成和好且指野仙幼子曰此與朝廷議姻者也實不敢對十九日實至懷來遇右都御史楊善侍郎趙榮同可汗普花所遣使皮兒馬黑麻比去蓋瓦刺國政皆野仙專之其兵最多普花雖爲可汗兵稍少知院阿刺兵又少君臣鼎足而立外親內忌其合兵南侵利多歸野仙而敵則均受及欲和則野仙恥屈意而陰使普花阿刺來言阿刺所遣脫懽旣與實等行普花所遣黑麻等復晏善等出惟慮和之不早



成也實等既至緣邊虜兵皆退二十九日善等至野仙營野仙方出獵八月初二日回營與善等相見

太上遣袁彬來會起臥長不離

御帳夜甚寒則以身爲

太上溫足彬嘗病

太上坐壓彬肩背取粥啖之以出汗至是復勞促善等盡言野仙遂許送

太上還京平章昂克曰既是送還有何禮物善等曰太師盛德豈有不報野仙曰昂克說不合理我圖

垂名後世爾衆酋聞善語皆以齒咬其指曰好漢初三日善等見


太上于伯顏帖木兒營初四日野仙請

太上太上至其營餞行野仙彈琵琶其妻舉酒善等侍飲執臣禮甚恭野仙嘆曰中國好禮數宴畢野仙送出帳十數步

太上登馬乃退蓋

太上在虜營踰年未嘗屈尊野仙聞見必致敬曰我人臣也何與天子抗禮哉嘗欲以其妹事

太上不從乃止以此深服聖德虜人往來窺覘



天容然殊無慘怛惟聞實等言聖母安好乃泫然出
淚飲食所餘多以賜中國被虜者及其將歸莫不
悲戀人亦不忍別連日各設饗餞行初八日

太上駕行伯顏帖木兒數百騎皆慟哭良久既別去
昂克於中路射麀獲之馳十數里來獻十三日至
宣府十四日駐懷來十五日駐唐家嶺

上遣內閣學士許斌高輅至
太上命書避位免群臣迎十六日自東安門入
上迎拜

太上蒼拜相抱持而哭各述授受之意推遜良久乃


送到南內群臣就見而退大赦天下有生成欣欣
焉臣竊謂

聖朝承平歲久釁孽潛滋內有奸臣播弄外有驕虜
憑陵故已巳中秋之變亘古所無然尚賴天心默
祐皇基鞏固振威以遏其侮厚德以化其順故庚
午中秋之慶亦亘古所無幹旋乾坤並明日月用
夏變夷撥亂反正何其神速也哉

按

英廟北狩蒙塵虜人侮禍旋奉

駕歸此自古之所無也固國家國勢之強亦人事



有以中其機會是時郅王監國不欲急君邊人
謝之曰中國有主矣虜人抱空贊而負不義於
天下所以汲汲來歸蓋合鄭公孫申之謀也

又按

景帝當多難之余而能任賢選將南征北距轉危
爲安易亂爲治其功可謂不細惟不欲奉迎
英廟只此一事大不是事雖不是而

英廟之歸實由於此何也蓋無意於迎者乃所以
迎之也不欲其歸者乃所以趣其歸此意也


景帝不知之也一時廷臣不知之也使當時急於

奉迎則彼必以爲我所重在此而挾留爲質以
休中國如宋之徽欽迎清愈勤而愈不可得矣
委骸沙漠爲萬世羞惟不急其君而無意於郊
則彼以爲與其抱空質而無用曷若歸之以樹
恩此漢高分羨之謬語所以謬敵而致大公之
歸是故

英廟之復歸天也非人謀之所及也雖然亦會逢
其適也值我


國家氣運之盛而胡虜之無大志也

臣因取目擊耳聞券以揚善奉使錄錢溥所述袁




彬傳約其繁蕪其爲此錄蓋出征之月否卦用事
之月也回鑿之年景泰紀元之年也先之以否繼
之以泰雖世運關天數矣名之曰否泰錄自以身
備史臣於國家大務不敢不具載以待遺忘故也
聖神相繼于億萬年撫念前事豈不增修致治保邦
之良圖哉





國立中央圖書館 NATIONAL CENTRAL LIBRARY, TAIWAN, R.O.C.



國立中央圖書館, NATIONAL CENTRAL LIBRARY, TAIWAN R.O.C.

